

HRÜTHOACHAREI KO

Sokothu Ko

1 Acharei sü Oramei no rachi ea oji sopie. ²Oji sü okhre ozhe hoe ea masa süe, ea kozü süno ozhe katei pile sü bue, ea Oramei raku süno odzü pheno ahepfo leie. ³Ea Oramei no pe,

“Kava sü pralo, ea kava sü praloe. ⁴Ea Oramei no kava sü zhiwo neloe; ea Orammei no kava sü kozü leno sokrileiotie. ⁵Oramei no kava süno chihra tto koloe, ea kozü süno pfo no chikhri tto koloe. Ea chithu ea chikro sü buloe, ea süsüno chithu kareini süe.

1:3 2 Kor 4:6

6 Ea Oramei no pe, “Odzü leno chimadei pralo, ea losü peno odzü leno odzü sü somakrileio.”⁷Ea Oramei no chimadei sü soloe ea çhimadei pile kobu ea chimadei khrule kobu odzü sü sokrileiotie. Ea sübvülotie.⁸Ea Oramei no chimadei süno rachi tto koloe. Ea chikro ea chithu sü buloe ea süsü chithu kahei ni süe.

9 Ea Oramei no pe, Rachi khrule kobu odzü thopfü sü obu kale kono adulo, ea oji kaki sü mapralo. Ea sübvülotie.¹⁰Oramei no oji kaki süno çhajiphe tto saloe, ea odzü adukowo süno ozhe katei tto pfo no saloe. Ea Oramei no hihi zhiwo neloe.¹¹Ea Oramei no pe, “Çhajiphe sü peno ovupro, otho kate sübu, ea rashibu khru sü alia thomate thephrüwo peno çhajiphe sü mapepralo.” Ea sübvüo pralotie.¹²Çhajiphe sü ovupro, alia thomate thephrüwo sübu, alia thomate thephrüwo rashibu khru sü pepralotie. Ea Oramei no hihi zhiwo nelotie.¹³Chikro ea chithu sü buloe ea süsü chithu kosü kochuni süe.

14 Ea Oramei no pe, “Chikhri ea chihra somakripralo koru duno chimadeiva rache hi kava sü mapralo, ea sükhru sü peno çhaka çohro, chithu çhilo ea mopfu sü mosülo koru amashi mosolo,¹⁵ea sükhru sü peno chimadeiva rachi kava sü mosowo çhajiphe sü mava pio.” Ea sübvülotie.¹⁶Ea Oramei no kava kaji kahei solotie, kava jikopuna süno çihrale duno ea kava kakheina süno çhikhri duno; ea pfo no chevu khru se sopie.¹⁷Ea Oramei no ojiphe mavapi koru duno sükhru sü chimadeiva rachehi kheipie.¹⁸Sütoko çhikhri çihra mavapi koru duno, ea kava sü kozü leno sokripi koru dunoe. Ea Oramei no süsü zhiwo nelotie.¹⁹Chikro ea chithu sü buloe ea süsü chithu padeini süe.

20 Ea Oramei no pe, “Ea odzüle sü kahrina tali mapralo, ea ruhu khru peno chimadeiva rachi no çhijiphe zhemituwo maleio.”²¹Süduno

Oramei no ozhe kateile khena kajili, ea ota krikriwo kahrina tali sopie, ea kosho kopfü ruhu tali sopie. Ea Oramei no hihi zhiwo nelotie.²²Ea Oramei no sükhru sü shihra pie, “Ozhe kateile sü peno pra phrolo, ea ruhu khru peno ojiphe sü moppropalo.”²³Chikro ea chithu sü buloe ea süsü chithu pongoni süe.²⁴Ea Oramei no pe, “Çhajiphe hi kahrina alia tta thephrüwo mapralo: Otumorü, opfu no nearo kata ea ojiphe khena alia tta thephrüwo mapralo.” Ea sübvüo pralotie.²⁵Ea Oramei no alia tta thephrüwo çhajiphe khena, tumorü, ea çhajiphe no opfu no nearo kata khena khru sü sopie. Ea Oramei no hihi zhiwo neloe.

26 Süthesü Oramei no pe, “I no ikhre-nga leno i yi bvüo omei yi sopi leshe; ea pfole yi peno ozhe kateile okho, cheva ruhu, tumorü, çhajiphe opfu no nearopfo kata khena, ea çhajiphe thopfü pile mochowohrüo.”²⁷Süduno Oramei no pfo khre-nga leno, Oramei khre-nga leno omei yi sopie, pfole ea nito pfo no sopie.²⁸Ea Oramei no pfohei yi shihra piwo pe, “Otona hrüzhiwo proshupralo, ea çhajiphe hrüphro matepralo ea kokhawohrüo, ea ozhe katei kajile kho, cheva ruhu khru, ea çhajiphe no kohrü khena thopfü pile mokhuwo hrüo.”²⁹Ea Oramei no pe, “Koleio, ai no çhajiphe thopfüle othomate kopfü ovupro thopfü, ea rashitho amashi sübu thopfü hi ni koto kosho sole.³⁰Ea çhajiphe khena thopfü, cheva ruhu, ea ojiphe opfu no nearo kata khena, osü kohiwo kobu kahrina thopfü koto kosho so koru duno ai no piwotie.” Ea hihi sübvülotie.³¹Ea Oramei no pfo alia sokowo thopfü sü nelotie, ea koleio hihi zhishutie. Ea çhokro ea chithu sü buloe ea süsü chithu çhoroni süe.

2 Sübvüo rache ea çhajiphe ea lole kobu thopfü sü somochulotie.²Ea chithu çhanini sü Oramei no pfo

no ovo sü somochulotie, ea pfo no chithu chanini sü pfo no koso ovole süno asoe. ³Oramei no chithu chanina sü shihrapie ea somothupie, adeiteli hinihi Oramei no sokocho pfo vo thopfü leno asoloe. ⁴Rache ea chajiphe sokapi acharei ko sü hikhru hie. LIPEO Oramei no rache ea chajiphe sokapi chisü,

Eden Topri

⁵Chajiphe sü sübu ea ovupro peprawo tsüpra moe, adeiteli LIPEO Oramei no chajiphe sü ochi morüngho pilo monghie, ea oji dewo ota takapimeihonghie; ⁶ana chajiphe no kahekru kali ajikhruue, ea ojipra thopfü sü odzü no kozüpie. ⁷Ea LIPEO Oramei no oji vano one pfolowo omei yi sopie, ea pfo ngho chilulehi kahri osü sü kohi thopie; ea omei sü kahrina kali pralotie.

⁸LIPEO Oramei no chinghei kaprapo Eden lehi topri kali soloe, ea lole sü hi pfo no sokapi omei sü pfo no kheipie. ⁹Ea chajiphe süno LIPEO Oramei no osübu tali sü mapeprapie. Sükhru sü kolei pfotho mamei zhie ea koto kosho duno zhie. Kahri sübu ea kazhi kashi süamakri sübu se topri totsü majile bue.

¹⁰Kori kali Eden le süno topri sü odzü kozü pilo koru duno mokrü kro pie, ea süthesü lohe süno kori padeiso krümara tatie. ¹¹Kareina zhu sü Pishon tie, hina hino shana kapra Havilah ji fühe thopfüle krühewe. ¹²Hile no kapra shana hi zhie; okrei kazhi omu kachi sü ea omu kachi onaix tu-e newe. ¹³Kori kaheina zhu süno Gihon tie; hinahi no Kush ji fühe thoupfüle krühewe. ¹⁴Kori kosüna zhu sü Tigris tie, hina hino Assaria chiprapo krütawe. Ea kori padei na sü Euphratis tie.

¹⁵LIPEO Oramei no omei yi peno Eden topri leno ota mata ea mokhu koru duno kheipie. ¹⁶LIPEO Oramei no

omei yi sü molewo pe, “Ni modoso toprile rashi kata-e toa zhie. ¹⁷Ana kazhi kashi süamakri rashi sü ni no tole moe, adeiteli ni no hihi to kolo chithuni sü ni thitile.”

¹⁸Süthesü LIPEO Oramei no pe, “Pfoto-o hi alia kobu zhi moe; ai no pfo yi duno okhalo koru sokokhro kali sopile.” ¹⁹Süduno LIPEO Oramei no ojine mano ojikke ea chiva ruhu thopfü sü sopie, ea sükhru sü pfoto-o he sü pfo no adei zhu sapi lesa tto kolei koru duno pfovupie; ea pfoto-o no kahrina katako ozhu sapi kocho süno lokhru zhu sü saloe. ²⁰Pfoto-o no otumorü thopfü, chiva ruhu khru, ea jiphe khena thopfü zhu sü sapie; ana pfoto-o duno sokokhro okha kaliko nemotie.

²¹Süduno LIPEO Oramei no pfoto-o sü somazhetitotie, ea pfo no ozhe koto chino pfo vano koturepo kali süzha praloe ea lobule sü oso no tho maka piwtie; ²²ea LIPEO Oramei no pfoto-o vano pfo kaphra koturepo süno pfo no nitomei kali sopie ea lopei sü pfoto-o he pfovupie. ²³Süthesü pfoto-o no pe,

“Okheisowo hihi are leno

pfokaphra are koe

ea aso leno pfokaphra aso koe;

lopei yi hino nitomei tto kole,

adeiteli hipei hi pfothomei vano

pfophraloe.”

²⁴Süduno pfothomei kali no pfo pfo ea pfo pfü yi theotiwo pfo chemei yi sü kohrütiwe, ea pfohei sü oso kali sotiwe.

²⁵Pfoto-o ea pfo che pfohei sü masakhrei leisüe, ana ahre moe.

Omei no Ochüzümo Koto

3 Ichowo khengho no LIPEO Oramei no sokapi ruso hrule kakri dzüno chakeipue. Pfo no nitopei he pe, “Nihei no toprile rashi katako kochuma tolemoe tto Oramei no pewowo?”

²Nitopei no khenghohe pe, “I no toprile rashi katako to-e zhie; ³ana Oramei no pe, ‘Nile no topri totsü

majile kobu rashibu nava rashi hi tole moe, mo-e nile no hihi dei-e deile moe, sübvüli nile thitile.’”

4 Ana khengho no nitopei he pe, “Nile no thi lemoe. ⁵Adeiteli Oramei no süwe süli nile no hihi tokolo thesü nile nghei hrupra tile, ea nile no Oramei bvütile, kazhi kashi sümakrilo tile.”

6 Süduno nitopei no rashibu sü tozhishule tto nelotie, ea losü koei pfotho zhishutie, ea omei yi sochakei pilo koru duno rashi sü monüshu lowo lopei no rashitho sü hrato lotie; ea lopei no kopoko lopei chow yi se pie, ea pfo se tolotie. ⁷Süthesü pfohei nghei sü hrupralotie, ea pfohei sü masa leisüe ticho pfohei no sülotie; ea pfohei no chidongho no torükapa lowo pfohei dzükohu solotie.

8 Ea LIPEO Oramei no amake phachi no topri leno taleikowo khu sü cholotie, pfoto—o ea pfo che sü LIPEO Oramei nghodzüno toprile sübu khru hruleno kotsütie. ⁹Ana LIPEO Oramei no pfoto-o sü kowo pfohe pe, “Ni adeichi bue?”

10 Ea pfo no pe, “Ai topri leno ni khu choe, ea ai no pritie, adeiteli ai masakhrei butie; ea ai alia kotsütie.”

11 Pfo no pe, “Ni masakhrei butie ticho athe no ni he pe? Ni yino tosho tto kape rashi bunava tino ni rashi toloti momo?”

12 Pfoto-o no pe, “A yi mapa koru duno ni no kapi nitopei tino rashibu vano rashi a yi piwo ai tolotie.”

13 Süthesü LIPEO Oramei no nitopei he pe, “Ni no sokowo hi adeitiwe?” Nitopei no pe, “Okhengho no a yi kolawtie, ea ai no tolotie.”

Oramei no Icha Kapi

14 Süthesü LIPEO Oramei no khengho he pe, “Ni no hihi sokowo duno, otumorü thopfü dzüno, ea oruso kakri thopfü dzüno ni kashi kakha sü so. Ni hrü mameile ni pfu no niaropfo tale, ea ni no ojine towo hrüle. ¹⁵Ai no

ni ea nitopei kole, ea ni shulu ea lopei shu-lu kole amahrei sü thopile; pfo no ni pivahi izhu pile, ea ni no pfo phiku sü made pile.”

16 Nitopeihe pfo no pe, “Ai no ni napfü nopfo kochochi ni amazhe sü pipule; ni chikhe sowo moto monole, sübvümate-e ni no ni chow yi sü monüle, ea pfo no ni pile kokhale.”

17 Ea Adam he pfo no pe, “Ni no ni chemei chü züwo ai no ni yino tosho tto kape ‘Ni no hihi tole moe’ ticho rashi sü to kolo duno ojine hi ni duno kazhi sochino; ni kohrü mameisa choho sowo hihi totile. ¹⁸Osüshu sü ni yi duno motsüprapi tile; ea ni no odole vupro sü totilie. ¹⁹Ni prava no kokhrüdzü prawo ni ojine le adaloti komosa ni koto kosho nitole, adeiteli ni yi hile hino pfophrae. Ni yi sü ojine no sopie, ea ni sü ojinele adalo krile.”

20 Adam no pfo chemei zhu sü Ef tto saloe; adeiteli lopei süno jiphemei thopfü pfü sütie. ²¹Ea LIPEO Oramei no Adam ea pfo che yi duno osohei no osa solowo pfo hei yi bapie.

Adam ea Ef yi Topri leno Matakowo

22 Süthesü LIPEO Oramei no pe, “Koleihio, omei hi itamei yi bvü tie ea kazhi kashi sümakrilotie. Pfo yi peno kahri sübu vano rashitho sü moto lowo chisa mahri lemoe.” ²³Süduno LIPEO Oramei no pfo yi sokapi ojine sü peno madeto koru duno Eden topri leno matawtie. ²⁴Pfo no omei yi sü humatawtie; ea Eden topri no chinghei kaprapo sühi pfo no kosho kopfü cherubim khena yi, ea lopei hipei keingho thopfüle mikri no phrupra kowo khrochu kali kheihi towo kahri sübu sü mokhulotie.

THE HOLY BIBLE

Mao - C.L.

10H 0031/94-95/3M STD

ISBN 81-221-4223-0

COPYRIGHT NOTICE

Written permission must be obtained from the Bible Society of India as copyright holder, prior to the reproduction of any part of this publication in any form or by any means, electronic or mechanical, including photocopying, recording, or any information storage and retrieval system.

Published by:

**The Bible Society of India
206 Mahatma Gandhi Road
Bangalore – 560 001**

Printed in India by Photo offset process at
Swapna Printing works pvt. Ltd, Calcutta-9